

Siunnersuummut nassuaatit

### **Oqaaseqaatit nalinginnaasut**

#### **1. Aallaqqaaasiut**

Siunnersut una Inatsisartut 2018-imi upernaakkut ataatsimiinnerannut atatillugu saqqummiunneqarpoq kisianni 2018-imi upernaakkut qinersisoqartussaanera pillugu siunnersut suliarineqarani. siunnersut maannakkut Inatsisartut 2018-mi ukiakkut ataatsimiinneranni saqqummiunneqartoq siunnersuutip Inatsisartut upernaakkut 2018-mi ataatsimiinnerannut atatillugu saqqummiunneqartup imarisaa tunngaviatigut assigaa.

Uumasunik illersuineq pillugu Inatsisartut inatsisaata (uumasunik illersuineq pillugu inatsit) allanngortinnissaanut siunnersut Kalaallit Nunaanni uumasuutilerinerup inuussutissalerinerullu patajaallisarnissaannut suliniutip ilagaa.

Naalakkersuisooqatigiinnissamut isumaqatigiissut naapertorlugu politikkikkut kissaatigineqarpoq uumasuutilerineq tamaat Danmarkimit tiguneqassasoq. Tigusinermi pitsaanerpaanik atugassaqarnissaq qulakkeerniarlugu tunngavigisap ingerlateqqinnissaa, pitsaasuunissaa atorneqarsinnaaneralu pisariaqarpoq.

Uumasunik illersuineq pillugu inatsit Kalaallit Nunaanni uumasunut tamanut atuuppoq. Tassani pineqarlutik angerlarsimaffimmu uumasuutit, qimmit qimuttut aammalu nunalerinermi uumasuutit. Uumasut illersorneqarnerat pillugu inatsimmi pingaarnertut siunertaavoq uumasut timikkut, pissutsimikkut peqqissutsimikkullu pisariaqartitaannut tunngatillugu uumasut pitsasumik illersorneqarsinnaasumillu paarineqarnissaasa qularnaarneqarnissaa. Siunertap taassuma eqqortinniarnerani uumasuutini pissutsit pitsaasut kiisalu uumasut tunisassiassat peqqissut qularnaarneqassapput. Uumasut tunisassiassat peqqissut toqorarneqarneranni neqignerussapput taamaallillutilu aningaasatigut naleqarnerullutik. Qimmit qimuttut peqqissut qimutsillutik nukissaqarluarnerusarput. Nunami maani uumasut pitsaanerpaamik isumagineqarnerat inuiaqatigiinnut annertuumik iluaqutaassaaq.

Uumasunik illersuinermut tunngasunik isumaginninnermi immikkut ittumik ilisimasaqartoqarnissaa paasisimasaqartoqarnissaalu pisariaqarput. Uumasut illersorneqarneranni tunngasuni sulianik naliliinerit taamatut immikkut ilisimasalinnit ingerlanneqartariaqarput. Taamaattumik siunnersuutigineqarpoq Naalakkersuisut ataanni uumasuuteqarnermut oqartussat tamanna pillugu inatsimmi aalajangersakkat naapertorlugit uumasut pineqarnerat pillugu siunissami peqqusisassasut. Taamaaliornikkut immikkoortup pisariaqartumik sallernut ilaatinneqarnissaa Naalakkersuisut ilimagaat.

## **2. Siunnersummi immikkoortut pingaarnerit**

### *2.1 Pisinnaatitaaffiit politiiniit Naalakkersuisunut nuunneqarnerat*

siunnersummi matumani siunertaq pingaardeq tassaavoq uumasut illorsorneqarnissaat pillugu inatsimmi maannakkut atuuttumi politiinut pisinnaatitsinerit Naalakkersuisut ataanni uumasuuteqarnermut oqartussanut nuunneqassasut. Uumasuuteqarnermut oqartussat inuussutissanut aamma nappaatit uumasuniit inunnut tuniluuttartut pillugit inatsit kiisalu qimmit qimuttut, qimmit qitsuillu pillugit inatsit naapertorlugit pisinnaatitaaffiit tamakku assingi ingerlatereerpaat. Pisinnaatitaaffiit tamakku assingi uumasunik illersuineq pillugu inatsimmi atuutilersinnerisigut malittarisassat assigiinngitsut assigiaarnissaat qulakkeerneqassaaq, tamassumanilu uumasuuteqarnermut oqartussat uumasunik tamanik naallititsinerit il.il. qisuararfinginissaannut periarfissaat annertusineqassaaq, tassunga ilanngulligit pingartumik Kujataani naasorissaanermi uumasut. Aamma uumasut atugarissaanerannik naliliinissamut uumasuuteqarnermi oqartussat pisariaqartunik piginnaasaqarput.

### *2.2 Uumasut kinguaassiuutitigut atoqatiginissaannut imaluunniit kinguaassiuutitigut iliuuseqarfigineqarnerinut inerteqqu*

Uumasunnik kinguaassiuutitigut atoqateqarneq maannakkut erseqqissumik inerteqqutaalissasoq siunnersuutigineqarpoq. Inatsosit assingusut ilaatigut Norgemi, Sverigemi Danmarkimilu ilisimaneqarput. Sverigemi inerteqqussut *djurskyddslagen*-imi takuneqarsinnaavoq uumasunik atoqateqarnermut inerteqqummik imaqartoq. Inuaqatigiinnut iluaqutaasumik iliuutsit assersuutigalugu uumasunut nakorsaasersuinernik siunertaqartut, uumasut anisuuunik katersinerit assigisaaluunniit inerteqqummi pineqanngillat. Norgemi inerteqqussut *dyrevelferd*-imi takuneqarsinnaavoq, tassanilu uumasunik atoqateqarneq uumasunillu kinguaassiuutitigut iliuuseqarneq inerteqqutigineqarluni. Norgemi inatsimmut oqaaseqaatini allaqqavoq, uumasut anisuuannik katersineq, naartutitsiniarneq aammalu kinguaassioritsiniarnermi iliuutsit kinguaassiuutitigut iliuuseqarnikkut isigineqanngitsut. Danmarkimi inerteqqu *uumasunik illersuinermut inatsimmi* allaqqavoq, taamatullu aamma uumasunik atoqateqarneq imaluunniit kinguaassiuutitigut eqqunngitsuliorneq inerteqqutaallutik. Aammattaaq uumasunik nakorsaasersuinerit imaluunniit uumasut pillugit teknikki pissutigalugit iliuuseqarnerit, inerteqquteqarnermut ilaanngitsut.

Danmarkimi uumasunik atortittarfiit aammalu Europamiut takornariat tamakkuninnga atuinissamik siunertaqarlutik Danmarkimut tikittartut pillugit tusagassiorfinni tusagassiuinerit kingunerisaannik politikkikkut piffissami sivisuumi sammineqarnerisa kingorna inerteqqu 2014-imi atuutilersinneqarpoq. Aatsaalli siullermeeluni uumasunik atoqateqarnerup inerteqqutigineqarnera danskit inatsisaanni atortinneqalinngilaq. Kunngip Christian tallimaata nalaani danskit inatsisaanni 1623-imeersuni, eqqunngitsuliornerit pillugit inatsisit pillugit atuakkat arfernanni "Pinngortitaq akimorlugu iliuuseqarneq" (6-13-15) pillugu aalajangersagaq allaqqavoq. Aalajangersakkamili tassani uumasunik atoqateqarneq kisimi

pineqanngilaq, aammali angutit suiaaqatigiillutik atoqatigiinnerat pinerluuteqarnertut isigineqaruni. Aalajangersagaq "Pinngortitamut eqqunngitsumik iliuuseqarneq" innuttaasunik pineqaatissinneqartnerat pillugu inatsimmi § 177-imi 10. februar 1866-imeersumi ingerlateqqinnejarpooq. Aalajangersagaq innuttaasut pineqaatissinneqartnerat pillugu inatsisip nutarterneqarneranut atatillugu 1930-mi atorunnaarsinnejarpooq, tamatumalu kingorna uumasunik atoqateqarneq danskit inatsisaanni erseqqarinngitsumik inerteqqutigineqarnikuunngilaq, uumasoq pisup nalaani anniarsimanngippat ajoquusersimanngippalluunniit, kiisalu pisumi aalajangersakkanik allanik unioqqutisoqanngippat soorlu kanngunartuliorluni.

Kalaallit Nunaata uumasunik illersuinermut tunngasut qimminik uumasunillu illersuineq pillugu Kalaallit Nunaannut inatsisikkut 1. januar 1999-imeersukkut tiguai. Tamatuma kingorna uumasunik illersuineq pillugu malittarisassat uumasut illersorneqarnerat pillugu Inatsisartut inatsisaatigut nr. 25, 18. november 2003-meersukkut aalajangersarneqarput. Kalaallit Nunaanni uumasunik illersuineq pillugu inatsit, danskit inatsisaata akerlianik, uumasut illersorneqarsinnaasumik paarineqarnissaat aamma anniarnissamut naalliunnissamullu illersorneqarnissaat pillugu aalajangersagaqarnikuunngilaq. Tamanna taamaallaat siunertaq pillugu aalajangersakkami allassimavoq, taamaalilluni pingaaruteqarani. Inatsimmi § 3 naapertorlugu *piginnittoq* taamaallaat uumasuutiminik isumassueqquneqarpooq aamma timikkut, piissusilersonnikut aammalu peqissuunissamut pisariaqartitai eqqarsaatigalugit paarsilluaqquneqarluni. Tamanna inuit uumasunut kinguaassiutitigut piissusilersonneranut tunngatillugu annertuumik amigaateqarpooq. Amigaat tamanna siunnersummi matumani maannakkut matussuserneqarpooq.

Siunnersuut una inatsisip siunertaq pillugu aalajangersakkap allanngortinneranik aamma imaqarpooq, taamaalilluni piussaaffeqavinnertut maannakkut oqaasertalerneqarluni, tamannalu tunngavigalugu maannakkut pineqaatissiisoqarsinnaalerpoq.

Naalakkersuisut isumaqarput uumasup ajoquusersimanera imaaliinnarluni takussutissaqanngikkaluartut inerteqqummi ilanngunneqartariaqartoq. Naalakkersuisut isumaqarput inuup uumasumut kinguaassiutitigut atoqateqarnera aamma uumasunik kinguaassiutitigut iliuuseqarnera uumasumut ataqqinninnerut aamma uumasunik isumassuinermut uumasulerinermi suniluunniit tunngaviusunut tunngaviusariaqartunullu akerliusq. Peqatigisaanik uumasut immikkullarissuunerat taamaalillunilu nalinginnaasumik iliuuseqartnerat qisuariartarnerallu mianerineqassapput. Tamatuma saniatigut aalajangersimasumik inerteqquteqarnerup pinaveersaartitsinermik kinguneqarnissaa naatsorsuutigisariaqarpooq. Inuup uumasumik atoqateqarnerata kingunerisaanik uumasup ajoquusersimanera ilaatigut uppernarsaruminaassisinnaavoq. Taamaalilluni erseqqissumik inatsiseqarnerup ajornartorsiutip taassuma pinngitsoortinnissaanut aamma iluaqutaasinnaavoq. Aalajangersimasumik inerteqquteqarneq ajornartorsiutip taassuma aaqqiivigineqarnissaanut aamma tapersiisinnaavoq.

### *2.3 Akisussaaffiup annertusinera*

Siunnersummi § 1-imí akisussaaffiup annertusinera ilanngunneqarpoq. Siusinnerusukkut § 3 naapertorlugu uumasunut iliuuseqarnermut akisussaaneq taamaallaat uumasumut akisussaasumiippoq. § 1-p aalanngortinnissaanut siunnersuuteqarnikkut inatsimmi aalajangersakkat naapertorlugit uumasunik iluamik iliuuseqarnissaq kikkut tamarmik maannakkut akisussaaffigilerpaat.

### *2.4 Pineqaatissiinissamut periarfissat sakkortunerusut*

Akiliisitsinerinnaq imaluunniit uumasuuteqarsinnaanermut piginnaatitaaffimmik arsaarinninneq il.il. taamaallaat pinnagu siunnersummi sukannererusumik pineqaatissiisinjaaneq atuutilersinneqassaaq. Misilitakkat naapertorlugit uumasunik illersuinermut tunngasuni pingartumik akiliisitsisarnerit annikitsuararsuuneri eqqarsaatigalugit akiliisinneqariaannaanani isertitsivimmut inissinneqarnissaq anusinngorsaataanerusumik sunniuteqartarput. Uumasunik illersuinermi inatsisip unioqqutinneqarnerani akiliisitsinerit 500 koruunimik annertussuseqarajuttarput. Taamaalilluni Kalaallit Nunaannut pinerluttulerineq pillugu inatsimmi malittarisassat naapertorlugit isertitsivimmut inissinneqarsinnaanermik periarfissaqalernera kisiat eqqarsaatigalugu tamanna pitsaliuinermik kinguneqassasoq naatsorsuutigisariaqarpoq.

Tamatuma saniatigut nunami maani uumasut illersorneqarneranni unioqqutitsinerit annertuut ilaatigut takusarpagut, taakkulu pillugit sakkortunerusumik pineqaatissiissutigineqarsinnaasariaqarput.

### *2.5 Inissiineq tunniussinerlu*

Uumasunik tuniniaaqinneq imaluunniit allamut tunniussineq pillugu qitiusumik oqartussat aalajangiisinjaanermik periarfissaqarnerat atuutilersinneqassasoq siunnersuutigineqarpoq. Taamatut periarfissaqarneq assersuutigalugu savaateqarnermi atorneqartussatut eqqarsaatigineqarpoq, uumasut peqqissut ajornanngitsumik allamut tunniunneqarsinnaallutik taamaalillutillu suli inuaqtiginnut iluaqutaassallutik.

Inissiineq suliamik misissusoqartillugu aalajangiiniartoqartillugulu pissutsit iliutsilluunniit pineqaatissiissutaasinjaasut ingerlaqqinnissaannut tassunga peqatigitillugu illersuutaassaaq. Siusinnerusukkut takuneqartareerpoq innuttaasut assersuutigalugu paarsinerunnerup kingunerisaanik qimmitik toqutsiinnartaraat imaluunniit qimmit toquinnartartut, aatsaallu nalunaarutigineqarneraniit ukiut marluk qaangiunnerisigut aalajangiivigineqartarlutik. Tamatuma kingorna innuttaasoq uumasuuteqaqqusajunnaarlugu uumasulereqqusajunnaarlugulu pineqaatissinneqarpoq, suliallu ingerlanerani, taamaattoq suliap ingerlanneqarnerata nalaani qimminik qimuttunik nutaanik pissarsisarsimalluni. Qimmit qimuttut nutaat eqqartuusummik nalunaaruteqareernerup kingorna qanoq pineqassanersut maannakkut apeqqutaalertarpoq. Qimmit toqunneqarnissaat pisortat maannakkut periarfissatuarat. Suliap ingerlanerani qimmit taakku siunnersuut nutaaq

manna atorlugu peerneqarsinnaalissapput kingornalu piginnittumut illorsorneqarsinnaasumik paarsisinnaasumut allamut qimmit inatsimmi aalajangersakkat malillugit tunniullugit. Taamaattumik aalajangersagaq inuiaqatigiinnit pissarsissutaalluartussat pigisanillu maangaannartitsinissamik pinngitsoortitsisussatut isigineqartariaqarpoq.

<b>Siunnersuut inatsimmut atuuttumut sanilliullugu</b>	
Oqaasertaliineq atuuttoq	Inatsisissatut siunnersuut
	<p style="text-align: center;"><b>§ 1</b></p> <p>Uumasunik illersuineq pillugu Inatsisartut inatsisaanni nr. 25, 18. december 2003-meersumi ukua allanngortinneqarput:</p>
<p style="text-align: center;"><b>Kapitali 1</b></p> <p>Inatsisip siunertaa atuuffiilu</p>	<p><b>1.</b> Kapitali 1-imikapitalip qulequataa imatut oqaasertalerneqarpoq:</p> <p style="padding-left: 40px;">"Uumasunik illersuineq pillugu aalajangersakkat nalinginnaasut".</p>
<p style="text-align: center;"><b>Kapitali 2</b></p> <p>Uumasuuteqarneq</p>	<p><b>2.</b> Kapitali 2-mut qulequataritinneqartoq peerpoq.</p> <p style="padding-left: 40px;"><i>Kapitalit 3-10 matuma kingorna kapitali 2-9-nngorput.</i></p>
<p>§ 1. Inatsisartut inatsisaanni siunertarineqarpoq uumasut illorsorneqarsinnaasumik pineqartarnissaasa isumannaarinniffigineqarnissaat sabinngisamillu anniartinneqarnissaannut, naalliutsinneqarnissaannut, ersiorinneqarnissaannut, kingunipiloqartitsisumik ajoquitissarsinissaannut annertuumillu ajoquitissarsinissaannut illorsorneqarnissaat.</p>	<p><b>3.</b> § 1 imatut oqaasertalerneqarpoq:</p> <p style="padding-left: 40px;">“ <b>§ 1.</b> Uumasut illorsorneqarsinnaasumik pineqartassapput anniartinneqarnissaannut, naalliutsinneqarnissaannut, ersiorinneqarnissaannut, kingunipiloqartitsisumik ajoquitissarsinissaannut annertuumillu ajoquitissarsinissaannut pitsaanerpaamik illorsorneqassapput.”</p>
	<p><b>4.</b> § 3-p kingorna ilanngunneqarpoq:</p> <p style="padding-left: 40px;">” <b>§ 3 a.</b> Uumasunik kinguaassiuutitigut atoqatiginnineq imaluunniit kinguaassiuutinut tunngasunik iliuuseqarneq inerteqquaavoq, taamaattorli imm. 2 takuuk.</p>

	<p><i>Imm. 2. Uumasut katsorsarneranni nakorsaatitortitsineq imaluunniit uumasunut teknikkimik pissuteqartumik suliarineqartut, iliuuserineqartut inerteqquummut ilaangillat, matumanii kinguaassioritsineq, amerliartortitsineq uumasunik misileraaneq imaluunniit allanik akuerisaasumik tunngaveqartut ilanngullugit.”</i></p>
<p><b>§ 22.</b> Inatsisartut inatsisaata matuma taannalu naapertorlugu najoqqtassaliunneqartut eqquutsinnejarnissaat Naalakkersuisut nakkutigissavaat.</p> <p>Imm. 2. Uumasut nakorsaat uumasup eqqunngitsumik pineqarneranik pasitsaassaqartoq tamatuminnga politiinut imaluunniit kommune fogedimut erngerluni nalunaaruteqarnissaminut pisussaavoq.</p> <p>Tamannali pissuseq annertorujussuannngippat erngerlunilu iluarsineqarpat atuutinngilaq.</p>	<p><b>5. § 22</b> imatut oqaasertalerneqarpoq:</p> <p>“ <b>§ 22.</b> Inatsisip matuma taannalu naapertorlugu najoqqtassaliunneqartut eqquutsinnejarnissaat Naalakkersuisut nakkutigissavaat.</p> <p><i>Imm. 2. Uumasut nakorsaat imaluunniit qimmeqarnermut nakkutilliisoq uumasup illersorneqarsinnaanngitsumik pineqarneranik paasisaqaqartoq piaartumik uumasuuteqarnermut oqartussaasunut nalunaaruteqassaaq. Taamaattorli inassuteqaat erngerluni iluarsineqarpat tamanna atuutinngilaq.</i></p> <p><i>Imm. 3. Uumasut nakorsaata imaluunniit qimmeqarnermut nakkutilliisup uumasoq ajoquusersimasoq napparsimasorluunniit takusaruniuk uumasoq ajorunnaarsinnejarnsinnaanngippat, uumasullu uumatiinnarnissaa pisariaqanngitsumik anniarnermik kinguneqassappat, uumasuuteqartoq aki-sussaasoq inassavaa uumasoq toqutseqqullugu. Uumasoq toqunneqanngippat uumasut nakorsaata imaluunniit qimmeqarnermut nakkutilliisup uumasuuteqarnermut oqartussanut pisoq 24 tiimit iluanni nalunaarutigissavaa.</i></p> <p><i>Imm. 4. Uumasuuteqartup akisussaasup imm. 3 malillugu inassuteqaat malikkumanngippagu § 23-milu periuseq malinneqarpat uumasumut</i></p>

	<p>pisariaqanngitsumik anniarnermik kinguneqassappat uumasut nakorsaata imaluunniit qimmeqarnermut nakkutilliisup uumasoq erngiinnaartumik toqussinnaavaat. Uumasoq toqunneqarpat uumasuuteqarnermut oqartussanut ulluinnaat tallimat iluanni nalunaarutigineqassaaq.”</p>
<p><b>§ 23.</b> Uumasut eqqunngitsumik pineqarpata uumasup pineqarnissa pillugu uumasumut akisussaasoq politiinit peqqusissuteqarfingineqarsinnaavoq. Imm. 2. Uumasoq napparsimappat iluarsineqarsinnaanngitsumilluunniit ajoquersimappat uumaannassagunilu naalliuppallaassappat toqutinneqarnissa politiit peqqusissutigisinnaavaat. Imm. 3. Uumasup § 6, nr. 4 malillugu aalajangersakkanik unioqqutitsilluni uumasutigineqartup pisariaqarpat toqutinneqarnissa politiit peqqusissutigisinnaavaat. Imm. 4. Peqqusissut allaganngorlugu nalunaarutigineqassaaq. Peqqusissutip nalunaarutiginnginnerani politiit oqaaseqaataat pissarsiareeqqaassavaat. Kiisalu uumasumut akisussaasusoq oqaaseqarnissaminut periarfissaqartitaassaaq. Imm. 5. Imm. Uumasup naalliorujussuarnissaa pinngitsoortinniarlugu imaluunniit akisussaasoq naapinnejqarsinnaanngippat imm. 4 pisariaqarneratut annertutigisumik sanioqqunneqarsinnaavoq.</p>	<p><b>6.</b> § 23 imatut oqaasertalerneqarpoq:</p> <p><b>“ § 23.</b> Uumasoq illersorneqarsinnaanngitsumik pineqarpat uumasuuteqarnermut oqartussaniit uumasuuteqartoq akisussaasoq iliuuseqaqqullugu peqquneqarsinnaavoq.</p> <p><i>Imm. 2.</i> Imm. 1 imaluunniit 4 malillugu peqqussut malinneqanngippat uumasuuteqarnermut oqartussat uumasup paarineqarnera isumagisinnaavaat, tassungalu ilanngullugu uumasoq allamut inississinnaallugu.</p> <p><i>Imm. 3.</i> Uumasup tunineqarnissaa imaluunniit toqunneqarnissa pissutsit tamatumunnga pissutissaqartitsippata uumasuuteqarnermut oqartussat erngiinnaartumik kingusinnerusukkulluun niit aalajangersinnaavaat, tassunga ilanngullugit uumasup qanoq issusaa, siunissami uumasoq piginnittuminit paarineqaqqissinnaanersoq, imaluunniit uumasup allamut nuunnerani atingaasartuutit.</p> <p><i>Imm. 4.</i> Uumasoq napparsimappat peqqissarnejqarsinnaanngitsumilluunniit ajoquersimappat uumasup uumatiinnarneqarnissa pisariaqanngitsumik naalliuunneranik kinguneqassappat toqunneqarnissa uumasuuteqarnermut oqartussat peqqusissutigisinnaavaat.</p> <p><i>Imm. 5.</i> Uumasoq § 6, nr. 4 naapertorlugu</p>

	<p>aalajangersakkanut akerliusumik uumasuutigineqartup pisariaqarpat toqunneqarnissaa uumasuuteqarnermut oqartussat peqqussutigisinnaavaat.</p> <p><i>Imm. 6. Peqqussut allaganngorlugu nalunaarutigineqassaaq. Uumasumut akisussaasusoq oqaaseqarnissaminut periarfissaqartitaassaaq. Oqaaseqaat uumasuuteqarnermut akisussaasut qaammatisiutit malillugit ulla 14-it iluanni tigussavaat.</i></p> <p><i>Imm. 7. Uumasup pisariaqanngitsumik naalliunnissaa pinngitsoortinniarlugu imaluunniit akisussaasoq naapinneqarsinnaanngippat imm. 6 sanioqqunneqarsinnaavoq. Imm. 6 malillugu allakkatigut nalunaarut tamatuma kingorna periarfissaq siulleq atorlugu ingerlanneqassaaq.”</i></p>
§ 24. Uumasut nakorsaata imaluunniit politiit uumasoq erngerlutik toqutaatissinnaavaat, § 23, imm. 2-mi periaaseq malillugu tamanna uumasumut pisariaqanngitsumik naalliuppallaarnissamik kinguneqassagaluarpat.	<p>7. § 24 imatut oqaasertalerneqarpoq:</p> <p>“ <b>§ 24.</b> § 23, imm. 4-mi periaatsip malinneqarnera uumasup pisariaqanngitsumik naalliunnissaanik kinguneqassappat uumasuuteqarnermut oqartussat uumasoq ingerlaannaq toqussinnaavaat.</p> <p><i>Imm. 2. Uumasuuteqarnermut oqartussat toqutsisinnaanngikkunik allap toqutsinissaanik oqartussaasut piginnaatitsisinnaapput.”</i></p>
§ 25. § 23, imm. 2 aamma imm. 3 imaluunniit § 24 malillugit toqutitsinerit uumasup piginnittuanut taarsiissuteqarfiusussaanngillat. Imm. 2. § 23, imm. 1 malillugu peqqusissut malinneqanngippat politiit uumasoq toqutaatissinnaavaat uumasup piginnittuanut taarsiissuteqarfiusussaanngitsumik.	<p>8. § 25 imatut oqaasertalerneqarpoq:</p> <p>“ <b>§ 25.</b> Uumasup pisariaqanngitsumik naalliunnissamut illorsorneqarnissaa siunertalarlugu toqutsineq piginnittumut taarsiinertaqanngitsumik piginnittullu akiligassaanik pissaaq.</p> <p><i>Imm. 2. Uumasumik allamut nuussineq</i></p>

<p>Imm. 3.§ 23, imm. 1 malillugu peqqusissuteqarfigineqarsimasup aamma § 23, imm. 2 imaluunniit imm. 3 malillugit uumasuutimik toqutinneqarsimasumik piginnittup piumasaqaatigisinnaavaa suliassap eqqartuussisunut suliassanngortinneqarnissa. Tamatuminnga piumasaqaat aalajangiinerup pineqartumut nalunaarutigineqarnerata kingorna ullut 14-it qaangiutinnginneranni politiinit saqqummiunneqassaaq. Eqqartuussisunut tunniussineq kinguartitsiffiussanngilaq.</p>	<p>kiisalu § 23, imm. 3 malillugu tunisineq piginnittumut taarsiinertaqanngitsumik pissaaq. Uumasup nuunneqarneranut atatillugu aningaasartuutit piginnittumut akiligassanngussanersut nalileereernikkut uumasuuteqarnermut oqartussat aalajangersinnaavaat.</p> <p><i>Imm. 3. § 23, imm. 1-5 malillugit peqqusissuteqarfigineqarsimasup aalajangiinerup pineqartumut nalunaarutigineqarnerata kingorna qaammatisiutit malillugit ullut 14-it iluanni eqqartuussivinnut suliassanngortissinnaavaa. Eqqartuussivinnut suliassanngortitsineq kinguartitsissutaasinnaanngilaq, kisiannili § 23 imm. 5 tassani pineqanngilaq.”</i></p>
<p><b>§ 26.</b> Politiit eqqartuussisut akuersiseqqaaanngikkaluarlugit kinaassutsiminnut uppernarsaatip takutinneratigut pisariaqarfatiqut uumasuutinut ornigussinnaatitaapput. Politiit pisariaqarfatiqut ilisimasalimmik ilaqlarsinnaapput.</p>	<p><b>9.</b> § 26 imatut oqaasertalerneqarpoq:</p> <p>“ <b>§ 26.</b> Uumasuuteqarnermut oqartussat, pisariaqartutut nalilerneqarpat, kinaassutsimut uppernarsaat takutillugu eqqartuussiviillu aalajangiisinnagit inatsimmi aalajangersakkat taannalu malillugu malittarisassiat eqqortinneqarnissaat qulakkeerniarlugu uumasuutinut qaqugukkulluunniit ornigussinnaavoq.”</p>
<p><b>§ 27.</b> Akiliisitaanermik kinguneqarsinnaapput:</p> <p>1) tamanut tunngatillugu aalajangersakkanik §§ 3-5-im, § 7-im, § 8-mi, imm. 1-im, § 9-im, § 10-mi aamma § 11-im aalajangersarneqartunik unioqqutitsinerit,</p> <p>2) toqutitsinerit, pilattaanerit taamaaqataanillu passussinerit pillugit § 13, imm. 1-im, §§ 14 aamma 15-im maleruagassatut aalajangersakkanik sumiginnaanerit,</p> <p>3) uumasut takutitassiarineqarnerat niuerutigineqarnerallu pillugit aalajangersakkanik § 17-im oqaaseqatigiinni</p>	<p><b>10.</b> § 27 imatut oqaasertalerneqarpoq:</p> <p>” <b>§ 27.</b> § 1, § 3, § 3a, imm.1, §§ 4, 5 aamma 7, § 8, imm. 1, § 9, § 11, imm. 1, § 13, imm. 1, §§ 14, 15, 17, 18 aamma 20, aamma § 22. imm. 2 aamma. 3-mik unioqqutitsineq Kalaallit Nunaanni Pinerluttulerineq pillugu Inatsimmi malittarisassat malillugit akiliisitsinikkut pineqaatissiinernik kinguneqarsinnaavoq.</p> <p><i>Imm. 2. §§ 6, 10, aamma 12, § 13, imm. 2, §§ 16, 19, aamma 21-mi malittarisassianik unioqqutitsineq Kalaallit Nunaanni Pinerluttulerineq pillugu Inatsimmi</i></p>

<p>siullerni, § 18-imi aamma § 20-mi          aalajangersarneqartunik unioqqutitsinerit,          4) § 8, § 11, imm. 2-mi aamma § 17-imi          oqaaseqatigiit aappaat malillugit          akuersissutini tunniunneqartuni          piumasaqaatinik sumiginnaanerit,          5) § 22, imm. 2 malillugu          nalunaarutiginnnginnerit,          6) § 23, imm. 1, 2 aamma 3 malillugit          peqqusisummiq          nalunaarutigineqarsimasumik          malinninnginnerit.          Imm. 2. Maligassiani inatsit malillugu          suliarineqartuni maligassiani          aalajangersakkanik unioqqutitsinerit          akiliisitaanermik pillarneqarnissaat          aalajangersarneqarsinnaavoq.          Imm. 3. §§ 3-5-ni, § 7-mi, § 8, imm. 1-imi, §          9-imi, § 10-mi, § 11, imm. 1-imi, § 13, imm.          1-imi, § 14-imi, § 15-imi, § 17-imi          oqaaseqatigiinni siullerni, § 18-imi aamma §          20-mi imaluunniit maligassiani inatsit          malillugu suliarineqartuni aalajangersakkanik          unioqqutitsisoqarnera          uumasuuteqarsinnaanerup imaluunniit          uumasuuteqarnermi suliaqarsinnaanerup          inerteqququtigineqarneranik          pineqaatissinneqaataasinnaavoq.          Imm. 4. Imm. 4. Uumasuuteqarsinnaanerup          imaluunniit uumasuuteqarnermi          suliaqarnissap imm. 3 malillugu          inerteqququtigineqarnissaa          pineqaatissiissutigineqarpat tamanna          atajuartussatut imaluunniit sivikinnerpaamik          ukiumut ataatsimut pisinnaavoq.          Inerteqqummik taama ittumik          unioqqutitsineq akiliisitsinermik          kinguneqarsinnaavoq.          Imm. 5. Aktiaateqarluni imaluunniit          piginneqatigiissuteqarluni          ingerlatseqatigiiffiit, piginneqatigiinnikkut          ingerlatseqatigiiffiit assigisaalluunniit</p>	<p>malitarisassat malillugit akiliisitsinikkut          pineqaatissiinernik          aalajangersaasoqarsinnaavoq.</p> <p><i>Imm. 3</i> Inatsit imaluunniit malittarisassiat          taanna malillugu aalajangersarneqartut          akiliisitsinissamik piginnaatitsippata, inatsisit          malillugit inuttut isigineqartoq Kalaallit          Nunaanni Pinerluttulerinerineq pillugu          Inatsimmi malittarisassat malillugit          akiliisineqarsinnaavoq.</p> <p><i>Imm. 4.</i> § 1, § 3, § 3 a, imm. 1, §§ 4, 5          aamma 7, § 8, imm. 1, § 9, § 11, imm. 1, §          13, imm. 1, §§ 14, 15, 17, 18 aamma 20,          aamma § 22. imm. 2 aamma imm. 3-mik          sakkortuumik uteqqiattumilluunniit          unioqqutitsineq Kalaallit Nunaanni          Pinerluttulerineq pillugu Inatsimmi          malittarisassat malillugit sunilluunniit          atajuartumik piffissamiluunniit killilimmi          sivikinnerpaamik ukiumi ataatsimi          uumasuuteqaqusaannginnermik          pineqaatissiinermik kinguneqarsinnaavoq          kiisalu Kalaallit Nunaanni Pinerluttulerineq          pillugu Inatsimmi malittarisassat malillugit          pineqaatissiisoqarsinnaalluni.</p> <p><i>Imm. 5.</i> Akiliisitsinerit imm. 1-4          naapertorlugit aalajangerneqartut Nunatta          Karsianut tutsinneqartassapput."</p>
---	---

unioqqutitsisuuppata ingerlatseqatigiiffik ingerlatseqatigiiffittut akiliisitsinermik pillaatissinneqarsinnaavoq. Naalagaaffik, Namminersornerullutik Oqartussat, kommune imaluunniit kommuninit ataatsimoorussat unioqqutitsisuuppata taakku akiliisitsinermik pillaatissinneqarsinnaapput.	
	<b>11. Inatsimmi tamani danskisuuanı</b> "Landsstyret" imatut "Naalakkersuisut" amma "Landsstyrets" imatut "Naalakkersuisuts" allanngortinneqarput.
	<b>§ 2</b> Inatsisartut inatsisaat ulloq 1. juli 2019 atuutilersinneqarpoq.

### 3. Aningasarsiornikkut allaffissiornikkullu pisortanut kingunissai

Ilimagineqarpoq siunnersuummi Naalakkersuisut ataanni qitiusumik uumasuuteqarnermut oqartussaqarfik annertunerusumik pisussaaffilerneqassasoq. Uumasuuteqarnermut oqartussaneq ullumikkut Kalaallit Nunaanni Uumasuuteqarnermut Inuussutissanullu Oqartussaqarfimmippoq, maannakkut Aalisarnermut Piniarnermut Nunalerinermullu Naalakkersuisoqarfimmii inisisimasoq.

Uumasuuteqarnermut oqartussat uumasunik illersuineq pillugu inatsimmut kiisalu uumasuuteqarnermi malittarisassanut allanut tunngatillugu ilaatigut pisussaaffequareerput, tassunga ilanngullugu pingaartumik qimmit qimuttut kiisalu qimmiuteqarneq qitsuuteqarnerlu pillugit inatsisartut inatsisaannut, nappaatinut uumasut inuillu akornanni tuniluuttartunut il.il., Inuussutissat pillugit Inatsisartut peqqussutaannut kiisalu malittarisassanut allaffissornermi malittarisassianut atassuteqartunut tunngatillugu. Taamaalilluni uumasuuteqarnermut oqartussanut immikkoortoq nutaaq pineqanngilaq suliassaareersulli annertusineqarnerat pineqarnerulluni.

Inatsimmik allanngortitsinermi politiit siusinnerusukkut akisussaaffigisaannik uumasuuteqarnermut oqartussat allaffissiornikkut arlalinnik pisussaaffilerneqarput. Uumasuuteqarnermut oqartussat suliassaq naammaginartumik naammassisinnaajumallugu immikkoortumi isumalluutinik atuissallutik isumaqarput.

Inatsisip taamatut allanngortinneratigut uumasuuteqarnermut oqartussat pisussaaffimmik eqqortitsinissaannut nunap karsiata imatut annertutigisumik aningasartuuteqarnerunissaai

ilimagineqarpoq:

- Akissarsiaqartitsineq ingerlatsinerlu uumasut nakorsaata ukiup affaanit ukiup ataatsip tungaanut sulinissaata assinga (325.000-650.000 koruunit)
- Uumasunik illersuinermi suliassanut atatillugu angalanernut aningaasartuutit ingerlatsinermullu aningaasartuutit allat 200.000 koruunit.

Inatsisip allanngortinneqarnera ukiumut katillugit 525.000 – 850.000 koruuninik nunatta karsiata aningaasartuuteqarneruneranik kinguneqassasoq ilimagineqarpoq.

#### **4. Inuussutissarsiuteqartunut aningasaqarnikkut allaffissornikkullu kingunissai**

Siunnersuut inuussutissarsiortunut kinguneqassanngitsoq ilimagineqarpoq.

#### **5. Avatangiisinut, pinngortitamut inuillu peqqissusaannut kingunissai**

Siunnersuut pinngortitamut avatangiisinullu kinguneqassanngitsoq ilimagineqarpoq.

#### **6. Innuttaasunut kingunerisassat**

Siunnersuut innuttaasunut kinguneqartussatut ilimagineqanngilaq.

#### **7. Kingunissai allat annertuut**

Siunnersuut allatigut annertuumik kinguneqartitsissasoq ilimagineqanngilaq.

#### **8. Pisortanut kattuffinnullu il.il. tusarniaaneq**

Oqartussat uku piffissami 18. december 2017-imiit 10. januar 2018-imut tusarniaaffigineqarput.

Sulisitsisut (GE)	Qeqqata Kommunia
KNAPK	Qimussersartut kattuffiat (KNQK)
Kalaallit Nunaanni Politiit	Nunatta nakorsaaneqarfia
Danmarkimi inuussutissalerinermut aqutsisoqarfik:	Inuussutissarsiornermut, Suliffeqarnermut, Niuernermut Nukissiornermullu
Danmarkimi Inatsisink Atuutsitsinermut	Naalakkersuisoqarfik
Ministeriaqarfik	Ilinniartitaanermut, Kultureqarnermut,
KANUKOKA	Ilisimatusarnermut Ilageeqarnermullu
Kommuneqarfik Sermersooq	Naalakkersuisoqarfimmi
Kommune Kujalleq	Peqqissutsimut Naalakkersuisoqarfik
Qaasuitsup Kommunia	

Pinngortitamut Avatangiisinullu  
Naalakkersuisoqarfik.  
Namminiilivinnermut, Nunanut Allanut  
Nunalerinermullu Naalakkersuisoqarfik

Aningaasaqarnermut Akileraartarnermullu  
Naalakkersuisoqarfik  
Siulittaasup Naalakkersuisoqarfia

Siunnersuut piffissami tassani Naalakkersuisut tusarniaarnermi nittartagaanni  
[www.naalakkersuisut.tamanut.saqqummiunneqarpoq](http://www.naalakkersuisut.tamanut.saqqummiunneqarpoq).

Tulliuttumi tusarniaanermi akissutit allannguutissatullu siunnersuutit tiguneqarnikut allaaserineqarput. Oqaatigineqassaaq tusarniaanermi akissutit, uingasumik allanneqarsimasut, pingaaruteqartutut naliliineq tunngavigalugu taamaallaat pingarnersai issuarneqarmata.

Sulisitsisut (GE) aamma Danmarkimi Fødevarestyrelsi (FVST) siunnersuummut oqaaseqaateqarsimannngillat.

#### Kalaallit Nunaanni Qimussertartut Kattuffiat (KNQK)

*KNQK-ip siunnersuut tapersersorpaa, kisiannili siunnersuummi § 1-imut nassuaatini oqaasertaliussat isumaqatiginagit.*

Siunnersuutip kalaallisoortaata danskisoortaatalu misissorneqarnerata kingorna Aalisarnermut, Piniarnermut Nunalerinermullu Naalakkersuisoqarfimmit (APNN) paasineqarpoq nutserneqarnerata akornanni naapertuttoqanngitsoq, tamanna KNQK-ip isornartorsiuineranik kinguneqarpoq. Siunnersuutip siunertaanik paatsuinissaq pinngitsoortinniarlugu pineqartoq iluarsineqarpoq.

#### KANUKOKA

*KANUKOKA-mit oqaatigineqarpoq siunnersuummi § 23-mi pisortat ingerlatsineranni suliassat suliarineqartarnerat pillugu inatsimmi malittarisassat malinneqartariaqarnersut nalornissutigineqartoq.*

KANUKOKA-p oqaaseqaataanut APNN isumaqataanngilaq, taamaalillunilu § 23-mut nassuaatini iluarsisoqarnani.

*KANUKOKA § 25-imut nassuaavoq malittarisassaq suliap eqqartuussivinnut suliassanngortinnissaanut aalajangiinermi oqartussat suliami inuup peqataasup piumasqarsinnaaneranut pisinnaatitsisoq, isumaqarlunilu erseqqinngitsoq pisinnaatitaaffik taanna sooq § 23, imm. 7 aamma § 24 malillugu aalajangiinernut aamma ilaanngitsoq.*

APNN-ip aallarniutigalugu oqaatigissavaa inuup § 23, imm. 1 – 5 malillugu peqquneqarnikup suliaq eqqartuussivinnut suliassanngortissinnaagaa. taamaalilluni oqartussat peqqussutaat innuttaasup isumatiginngippagu oqartussat suliaq eqqartuussivinnut

suliassanngortissinnaanngilaa. § 27, imm. 6 aamma 7-imut innersuussineq eqqarsaatigalugu, suliassanik suliarinnittarnermut malittarisassat aqtsisoqarfíup malitassai peqarput, taamaammat imm. 6 aamma 7 § 25, imm. 3-miilaanngilaq

APNN-ip erseqqissarnikuuaa, inuup peqquneqartup suliassaq eqqartuussivimmut suliassanngortissagaa, ilaatigut siunnersuummi § 25 pillugu KANUKOKA-p oqaaseqaataata kinguneranik.

*KANUKOKA oqaaseqaateqarpoq, § 27-imut oqaaseqaatini allanneqartariaqartoq inatsimmik unioqqutitsinerni pineqaatissiinerit suunissaannik eqqartuussiviit toqqaanissamut periarfissaat ikilisinneqassanersut eqqarsaataanersoq, kiisalu uumasunik naalliutsitsineq pillugu Pinerluttulerineq pillugu inatsimmi uumasunik naalliutsitsineq pillugu § 101-imut ataqatigiinera qulaajarneqassasoq.*

APNN isumaqarpoq aalajangersakkami oqaasertaliussat naammattut, taamaattumillu § 27-imut KANUKOKAp oqaaseqaataa tunngavigalugu siunnersuummi ilangusseqqinnissaq pisariaqanngitsoq isumaqarluni. Pinerluttulerinermi inatsimmi § 101 pillugu oqaaseqaammut tunngatillugu APNN isumaqarpoq siunnersuummi iluarseeqqittoqarnissaanut pissutissaqanngitsoq. Uumasunik illersuineq aamma uumasunik naalliutsitsisarneq ataqatigiipput, malittarisassat arlaat atuunnersoq suliani ataasiakkaani nalilersuivinnermik tunngaveqassaaq.

### Qeqqata Kommunia

*Kommune siunnersuummut aallaaviatigut tapersersuivoq, pingaartumik uumasunik kinguaassiutitigut atoqateqarnermut inerteqqussummik atuutilersitsinissamik siunnersuut.*

*Kommune allapoq qimmit qimuttut kiisalu qimmiuteqarneq qitsuuteqarnerlu pillugit Inatsisartut inatsisaanni § 24-mi allassimasoq qimminik qitsunnillu illersorneqarsinnaanngitsumik iliuuseqarnermiq ilimagisaqarnermi "kinaluunniit" tamatuminnga uumasut nakorsaannut imaluunniit politiinut imaluunniit kommune fogedimut nalunaaruteqassasoq. Kommune allapoq pissutsit politiinut, uumasut nakorsaannut, il.il. nammineerlutik nalunaaruteqarsinnaanertik innuttaasut ilisimarpasinngikkaat. Kommuneep taamaattumik kissaatigaa innuttaasut nammineq suliassanik politiinut imaluunniit uumasut nakorsaannut nalunaaruteqarsinnaanerat siunnersuummi matumani erseqqissarneqassaaq.*

Tamanna pillugu APNN aallarniutigalugu oqaaseqassaaq inatsit eqqaaneqartoq taamaallaat qimmit, qitsuit qimmillu qimuttut pillugit atuuttuusoq. Aammattaaq inatsimmi akisussaaffik Naalakkersuisut aamma kommunit akornanni avinneqarnikuovoq, taamaattumillu qimmit qimuttut, qimmit qitsuillu pillugit inatsimmi agguisimaneq naapertorlugu kommunit sumiiffinni suli akisussaasuusut, taamaattumillu inatsimmi tamanna pillugu malittarisassiaq naapertorlugu innuttaasunit saaffiginissutinik tigusisussaallutik iliuuseqartussaallutillu.

Naggasiullugu APNN-imit oqaatigineqassaaq, kommunip oqaaseqaataa qimmit qimuttut kiisalu qimmiutit qitsuuteqarnerlu pillugit inatsisartut inatsisaannut annerusumik sammisuusutut isikkoqarpoq uumasunik illersuineq pillugu siunnersuummut uunga samminani, taamaattumillu APNN isumaqarpoq uumasunik illersuineq pillugu siunnersuummi tamanna tunngavigalugu aaqqiinissamik kinguneqanngitsoq.

*Kommune § 26 pillugu aamma oqaaseqarpoq, uumasuuteqarnermut oqartussat imminni nakkutilliinissaat ilimananngitsoq isumaqarfigalugu, kissaatigalugulu ilanngunneqassasoq sumiiffinni qimmilerisut il.il. sinnerlutik nakkutilliinissaannik uumasuuteqarnermut oqartussat qinnuiviginissinnaasut.*

Taamatut uumasuuteqarnermut oqartussat piginnaatitaanerink tunniussineq akuerineqarsinnaanngilaq. Najukkani qimmilerisut allalluunniit uumasut nakorsaata ilisimasaqarneratut uumasuuteqarneq peqqissuserlu pillugit ilisimasaqassasut ilimagineqarsinnaanngilaq. Aammattaaq § 26-imi piginnaatitsineq killeqartumik atorneqartussaavoq, taamaalillunilu piginnaatitaaffik kikkunnnulluunniit tunniunneqarsinnaanani.

Toqutsinissamut sumiiffimmi inummut piginnaatitsinissamut uumasuuteqarnermut oqartussat siunnersuummi periarfissaqareerput tamannalu amerlanertigut assersuutigalugu nakkutilliisumit kommunimi atorfeqartumit il.il. oqartussat naliliinissaannut atugassamik assimik upternarsaammik nassisumit saaffiginnitoqarneratigut pisarluni. APNN naliliivoq inatsimmi siunertaq eqqortinniarlugu periarfissaq taanna naammattoq, taamaattumillu tamanna tunngavigalugu aalajangersakkamik iluarsiisoqarnani.

Qeqqata oqaaseqaatai tunngavigalugit APNN allanik iluarsiinngilaq.

### Kalaallit Nunaanni Politiit

*Politiit siunnersuummut kiisalu allanngortitsinermut akisussaaffiit agguarnerinik siunnersuummi siunnersuutigineqartumut nalinginnaasumik tapersersuipput.*

*Politiit isumaqarput § 3 a, imm. 2-mi aalajangersagaq mininneqarsinnaasoq, tassa taamatut iliuuseqarnerit pineqaatissiinermik kinguneqarneq ajormata.*

Politiit isumaat APNN-ip isumaliutiginikuuaa, kisiannili taamatut iliuuseqarnerit imm. 1-imut ilaannginneri tamakkiisumik erseqqissuutinniarlugin aalajangersakkami imm. 2-p allanngortinnginnissaa toqqarlugu.

*Kommunefogedit siunnersuummi ingerlataqartutut ilanngunneqarnerinut tunngatillugu politiinit kissaatigineqarpoq inuit taakku ilaatinneqassanngitsut, tassa kommunefogedit politiit oqartussaaffiisa ataaniimmata, aamma imaannigimmat uumasut pillugit pissutsini il.il. paasisimasaqassasut.*

Taamatut isumaqarnermut APNN-ip politiit isumaqatigaat, siunnersummi lu tamani i iluarsiilluni.

Taakku saniatigut politiit oqaasertatigut iluarsiinissamut erseqqissaanissamullu annikitsunik siunnersuuteqarput, taakkulu siunnersummut ilanngunneqarlutik.

#### Aningaasaqarnermut Naalakkersuisoqarfik

Siunnersuutip aningaasaqarnikkut kingunissai pillugit siunnersuutip aaqqissuunneranut Aningaasaqarnermut Naalakkersuisoqarfik ikittuinnarnik oqaaseqaateqarpoq.

Aningaasaqarnikkut kingunissat allaaserinerini APNN annikitsunik iluarsiisimavoq.

### **Siunnersummi aalajangersakkanut ataasiakkaanut oqaaseqaatit**

#### § 1

Nr. 1 aamma nr. 2-mut

Kapitali 1-imni aamma 2-mi aalajangersakkat immikkoortinneri peerneqarpoq, taamaalilluni kapitalit taakku marluk kapitalimi ataatsimi ataatsimuulerlutik. Kapitalip nutaap qulequtaa tassaalerpoq "Uumasunik illersuineq pillugu aalajangersakkat nalinginnaasut", kapitalillu tullinnguuttut normulersorneri taamaaqataanik iluarsineqarlutik kapitali 3-10 matuma kingorna kapitali 2-9-nngorlutik.

Nr. 3-mut (§ 1)

§ 1 § 3 ilanggullugu nalinginnaasumik najoqqutassaavoq, tassani uumasut qanoq iliuuseqarfingeqassanersut aalajangersarneqarluni. Aalajangersakkat uumasunik illersuineq pillugu inatsit malillugu uumasunut iliuuseqarneq pillugu aalajangersarneqartut malittarisassiallu taakkununnga atasut tamarmik § 1-imut aamma § 3-mut atatillugit isigineqassapput.

§ 1-imni aalajangersagaq ilaatigut uumasut illorsorneqarsinnaasumik pineqartarnissaannik piumasaqaammik, ilaatigut umasoq anniarnissamut, naalliunnissamut, ersinissamut katsorsarneqarsinnaanngitsumik ajoquteqalernissamut aammalu annertuumik ajoquteqalernissamut sapinngisamik pitsaanerpaamik illorsorneqarnissaanik piumasaqaammik imaqarpoq.

Anniarnermik, naalliunnermik ersinermillu oqaasertaliinerni uumasumut timikkut, taarnikkut allatigullu sunniutaasinnaasut pineqarput. Kingunipiloqartitsisumik ajoquteqalernermik oqaasertaliineq illersuinermik anniarnermik ilaqarpoq. Tassani eqqarsaatigineqarpoq uumasup ataavartumik ajoquteqalersinnaanera. Aalajangersagaq malillugu uumasup passunnerani

kingunipiloqartitsisumik ajoquteqalernissaa akuerisaanngilaq, naak passunneqarnerani annianngikkaluartoq. Kiisalu uumasoq annertuumik ajoquserneqarnissamut sapinggisamik pitsaanerpaamik illersorneqassaaq. Ajoqusernerup annertunissaanik piumasaqaammi assersuutigalugu nalunaaqutsiinermi aammalu ataasiaannarlunilu aaviinerni ajoqusiinerit aalajangersakkap atuuffianut ilanngunneqanngillat.

Oqaasertaliinermi "sapinggisamik" nassuerutigineqarpoq tamatigut uumasumut annersitsinnginnissaq il.il. ajornarsinnaasarmat. Taamaattoq uumasumik naalliuutsitsineq pinngitsoorneqarsinnaasimagaluartoq aalajangersagaq naapertorlugu tamatigut unioqqutitsineruvoq.

#### § 1 naapertorlugu aallaaviusumik aamma inerteqqutaapput:

- uumasumut kingunipiloqartitsilersumik ajoquteqalersitsisisinnaasut imaluunniit anniartitsisinnaasunik atortoqarluni uumasunik unataaneq,
- kumaat piissartullu toqunniarlugit uumasut meqquinik killuinermut taarsiullugu uutanissaq,
- hestit nungullaassimasut toqoraavimmut tunniunnagit allamut tunniunneqarneri,
- sivikinnerusumik sivisunerusumilluunniit uumasoq anersaartinnaveersaassallugu imaluunniit perorsaanermut atatillugu persuttaaneq.

Allattuineq tamakkiisutut isigineqassanngilaq taamaallaalli pissutsinut aalajangersakkami ilanngunneqarsinnaasunut assersuutaannaalluni.

Aalajangersagaq tamanut atorneqarsinnaanngorlugu oqaasertalerneqarpoq, ilaatigullu uumasunik apuineremi pissaanermullu pingaaruteqarsinnaalluni. Imaanngilaq apuineremi uumasumik apuisup nammineq uninnissaa uumasumillu ikuiniissaa pisariaqartoq. Taamaalilluni pineqartup ikiortissarsiorissa naammassinnaavoq. Akisussaasuuneq pisut ataasiakkaat malillugit tamatigut nalilersorneqartassaaq. Apuisoq, pissaasoq uumasumillu allatigut ajoqusiisoq sapinggisamik pisariaqartumik ikuiniassaaq, tassunga ilanngullugu uumasup pissutsit tunngavigalugit sukkasumik sapinggisamillu anniartinnagu toqunnissaa isumagalugu.

Nr. 4-mut

(§ 3 a, imm. 1)

§ 3 a, imm. 1-imi aalajangersakkap siunnersuutigineqartup kinguneraa uumasunik kinguaassiutitigut atoqateqarneq imaluunniit uumasumik kinguaassiutitigut iliuuseqarneq inerteqqutaasut, tassunga atatillugu uumasoq anniartinneqarnersoq imaluunniit anniartinneqannginnersoq apeqqutaatinnagu.

Aalajangersakkami inuit tamarmik pineqarput, taamaalillunilu uumasumik piginnittuinnaanngitsoq.

Aalajangersakkami inuup iluarusunniarluni uumasumik atuilluni iliuusai tamarmik ilaapput. Pissusilorsorneq taamaalilluni atoqatigiinnermut tunngasariaqanngilaq imaluunniit inuup kinguaassiuutitigut atuinissaanut iluarusunnissaanullu pilerilersitsisariaqarani. Iliuuseqarneq kinguaassiuutitigut atuinermi iluarusussusimaarnermik kinguneqarsimanersoq aalajangersakkamik unioqqutitsisimanermut pingaaruteqanngilaq.

Kinguaassiuutileraluni pissusilorsornermi ilaavoq inuup kinguaassiuutiminik uumasup kinguaassiuutaanut imaluunniit timaanut attuuanninera. Tassani erseqqisumik pineqarpoq inuup kinguaassiuutaanik, timip ilanik allamik atortumilluunniit uumasup utsuanut itianulluunniit, manngussineq. Tamatuma saniatigut pineqarpoq uumasup kinguaassiuutiminik inuup utsuanut itianulluunniit manngussinera. Uumasumut kinguaassiuutitigut iliuseqarnermi ilaatigut ilaavoq uumasup kinguaassiuutaanik timimiluunniit malussarissunik atoqatigiittarnermut tunngasunik allanik aluttuineq. Kiisalu aamma inerteqqummi ilaavoq assersuutigalugu inuup assani, timimi pisattani allat atortulluunniit atorlugit uumasup kinguaassiuutaanik sunniiniarneq aammalu inuup kinguaassiuutaanik uumasoq sunniiniartillugu.

Uumasunut kinguaassiuutilerinissamik iliuseqarnissamilluunniit inerteqquteqarnissamik siunnersummi kinguaassiuutitigut iliuseqarneq nammineq kisimi pineqatissiissutigineqarsinnaanngilaq, aammali inuit allat uumasunut kinguaassiuileritinneri iliuseqartinneqarneriluunniit.

Kalaallit Nunaannut pinerluttulerineq pillugu inatsimmi § 13 malillugu aalajangersakkanik tamanik unioqqutitsinermut ilaapput iliuseqarnissamik kajumissaarineq, siunnersuineq pilerilersitsinerlu. § 3 a, imm. 1-imik siunnersuutigineqartumik unioqqutitseqataaneq ilaatigut uumasunik kinguaassiuutitigut isiginnaartitsinernut atorneqarsinnaassaaq, tassani inuk inuup allap uumasunik kinguaassiuutilerinerani kinguaassiuutitigulluunniit iliuseqarnerani peqataalluni, tassanilu isiginnaartoq ataaseq arlallilluunniit najuullutik. Inunnut uumasunik kinguaassiuutilerisut iliuseqartunulluunniit uumasumik ataatsimik arlalinnilluunniit atukkiussineq aamma pineqarsinnaavoq, uumasumik pineqartumik atukkiussinermi akiliisoqarnersoq akiliisoqannginnersorluunniit apeqquaatinngu. § 3 a, imm. 1-imik unioqqutitsinermut peqataaneq aamma pisinnaavoq, inuk uumasunik atortittarfimmik ingerlatsippu tassungalu atatillugu aningaasannanniarluni uumasumik ataatsimik arlalinnilluunniit inummut ataatsimut arlalinnulluunniit ataasiarluni arlaleriarluniluunniit uumasunik kinguaassiuutilerisumut kinguaassiuutitigulluunniit iliuseqartumut atukkiussilluni. § 3 a, imm. 1-imik siunnersuutigineqartumik unioqqutitsinermut peqataaneq aamma tassaasinnaavoq atortut uumasunik atoqateqarnermik takutitsisut, soorlu inunnik ataaseq arlallilluunniit uumasumik kinguaassiuutilerisunik kinguaassiuutitigulluunniit iliuseqartunik filmiliat assilisallu. Taamatut peqataaneq assersuutigalugu tassaasinnaavoq filmiliornerni assiliinerniluunniit taamaattumi imaaliinnaruni peqataaneq. Tassunga assiliisuulluni, nipilerisuulluni qaammaqqutilerisuuulluniluunniit.

Titartaaneq imaluunniit titartakkanik filmilorneq uumasunik kinguaassiuutilerinermik kinguaassiuutigulluunniit iliuuseqarnermik takutitsisut akerlianik § 3 a, imm. 1-imi siunnersuutigineqartumi ilaassanngillat. Aammattaaq assit, filmit titartakkat, titartakkallu filmiliat uumasunik allanik kinguaassiuutilerinermik kinguaassiuutigulluunniit iliuuseqarnermik takutitsisut, uumasulluunniit kinguaassiuutaannik takutitsisut § 3 a, imm. 1-ip siunnersuutigineqartup avataaniippuit.

(§ 3 a, imm. 2)

§ 3 a, imm. 2-p siunnersuutaasoq naapertorlugu iliuutsit ilaat qulaani allaaserineqartutut inerteqquteqarnermi ilaassanngillat. Tassaapput uumasut nakorsaataannik uumasulerinermiluunniit teknikkimut tunngasunik iliuuseqarnerit, soorlu,

- nappaammik suussusiliinissaq siunertaralugu kinguaassiuutinik misissuinerit,
- anisuunik katersinerit naartutitsiniarnerillu,
- kinguaassiotitsiniarnermut atatillugu suleriaatsit pisariaqartut allat,
- iliuutsit pisariaqartut allat taakkununnga assingusut, soorlu uumasut atorlugit misileraanermut atatillugu, tassani piumasaqaataalluni uumasut atorlugit misileraaneq pillugu malittarisassat tunngaviillu eqqortinnejassasut, imaluunniit
- uumasunik issuiineq, mannissaajaaneq kinguaassiorsinnaajunnaartitsinerluunniit.

Uani pineqassaaq inuiaqatigiinnut iluaqutaasumik iliuuseqarneq, assersuutigalugu uumasunik piginnittup suliffeqarfimmik ingerlatsiniarnermini pisariaqartumik iliuuseqarnera, pissutsillu nakkutigineqarlutik ingerlanneqartoq, inunnillu immikkullu piginnaasaqartunit annertunertigut ingerlanneqartoq. Siunnersuutigineqarpoq iliuutsit taamatut ittut § 3, imm. 1-imi inerteqqummut ilaatinnejassanngitsut. Ilutigisaanik tamassuma kinguneraa ilitsersuutissatut atugassanik iliuutsinik taaneqartunik filmiliorsinnaaneq assiliisinnaanerlu, tamanna § 3a, imm. 1-imi inerteqqutigineqartumut ilangunneqarnani. Aamma assingusumik akuerisaasumik pissutissaqartillugu iliuutsit, assersuutigalugu napparsimasoqartillugu nappaatinillu pinaveersaartitsinermut atatillugu uumasut kinguaassiuutaannik inuinnaat paarsinerat inerteqqummut ilaassanngilaq.

Nr. 5-imut (§ 22, imm. 2)

Aalajangersakkami aalajangersarneqarpoq uumasut nakorsaat kommuninilu qimmini nakkutilliisut sakkortusisamik nalunaartussaatitaasut. Allannguutissatut siunnersuutigineqartup kinguneraa nalunaarutit Naalakkersuisut ataanni uumasuuteqarnermut oqartussanut siunissami nassiunneqartassasut. Aalajangersakkami tamassuma saniatigut aalajangersarneqarpoq nalunaaruteqartussaatitaasup pisoq uumasuuteqarnermut oqartussanut sukkanerpaamik nalunaarutigissagaa. Pisoq ingerlaannaq iluarsineqarpat nalunaaruteqartussaatitaasoqanngilaq, assersuutigalugu uumasoq naammattunik

nerisassaqanngippat imissaqanngippalluunniit, piginnitorlu ingerlaannaq uumasumut imissamik nerisassamillu inissiippat imaluunniit pituuttat kalunnit ilassimasut ingerlaannaq iluarsineqarpata.

Nalunaaruteqanngitsoorneq pineqaatissiissutigineqassaaq, tak. siunnersummi § 1, nr. 10 (§ 27, imm. 1).

Pissutsinik taamaattunik nalunaaruteqartussaatitaaneq taamaallaat uumasut nakorsaannut kommuninnilu qimminik nakkutilliisunut atuuppoq. Pisussaaffiit inuit suliamik ingerlatsisut pingaartumik qimuttunik qimmeqarfinni uumasunik illersuinerup ilaaniq nakkutilliisutut pisussaaffiit eqqarsaatigalugit killiliineq taanna pissusissamisoortutut isigineqarpoq, allat assinganik pisussaaffileraanni ingasappallaassaaq.

Aalajangersakkami siunertaq siullermik tassaavoq uumasuutit paarinerlunneqarnerinik paasisaqartunut inunnut taaneqartunut ilaatigut tapersersuinissaq, aamma taassuma uumasunillu piginnittup akornanni pissutsit pissutigalugit pisup nalunaarutiginissaanut nangaasinnaaneq eqqarsaatigalugu.

(§ 22, imm. 3)

Uumasoq toquettariaqarpat nalunaartussaatitaasup uumasumut akisussaasoq toqutsinissamik kaammattussavaa, tamannalu piaartumik imaluunniit piffissap sivikitsup iluani isumagineqassalluni. Uumasoq piffissaliussap taassuma iluani toqunneqanngippat nalunaartussaatitaasup uumasuuteqarnermut oqartussanut nalunaarutigissavaa. Uumasuuteqarnermut oqartussat tamassuma kingorna periuseq § 23-miittoq malissavaat.

(§ 22, imm. 4)

§ 22, imm. 2 naapertorlugu peqqussuteqarnerup kingorna uumasup toqunneqarnissaata kinguartinneqarnera pisariaqanngitsumik uumasumut annertuumik naalliutsitsinermik kinguneqassappat imm. 3 naapertorlugu nalunaaruteqartussaatitaasup uumasoq ingerlaannaq toqussinnaavaa. Uumasut illersorneqarneranni tamanna pillugu aalajangersakkat naapertorlugit, kiisalu tassani toqtsineq pillugu malittarisassiat naapertorlugit toqtsineq piissaaq.

Nr. 6-imut (§ 23, imm. 1)

Aalajangersakkami Naalakkersuisut ataanni uumasuuteqarnermut qitiusumik oqartussat uumasup pineqarnissaannik akisussaasumut peqqusinissamik piginnaatinneqarput.

Peqqussut assersuutigalugu tassaasinnaavoq uumasut nerisinneqarnissaannik, imertinneqarnissaannik, paarinnissaannik, passunneqarnissaannik, nappaataasa katsorsarneqarnissaannik toqutsinissamilluunniit peqqusineq, tak. imm. 4. Peqqussut aamma uumasup piffissap ilaani atorneqannginnissaanik imaqarsinnaavoq, assersuutigalugu uumasup nerisaqarnikkut peqqussutsikkulluunniit qanoq innera pisariaqartitsippat hestip qaamatini

sisamani atorneqannginnissaa imaluunniit qimuttup qimunnissamut sukkaniunnermulluunniit atorneqannginnissaanik. Allattuineq tamakkiisuunngilaq, taamaallaalli uumasuuteqarnermut oqartussat peqqussutigisinnaasaannut assersuutitut isigineqassallutik.

§ 22, imm. 2 naapertorlugu nalunaaruteqartussaatitaasoq tassaagajuppoq uumasup illersorneqarsinnaanngitsumik pineqarneranik uumasuuteqarnermut oqartussanut paasissutissiisussaq. Kisianni kinaluunniit uumasuuteqarnermut oqartussanut nalunaarsinnaavoq, uumasuuteqarnermullu oqartussat namminerisaminnik pissutsinik qaqsitsisinnaapput.

(§ 23, imm. 2)

Imm. 1 imaluunniit imm. 4 naapertorlugu peqqussut malinneqanngippat uumasuuteqarnermut oqartussat uumasup paarineqarnissaa isumagitissinnaavaat, tassunga ilanngullugu uumasup allamut inissinneqarnera. Kalaallit Nunaanni pissutsit pissutigalugit taamatut uumasup allamut nuunneqarnissaa tamatigut periarfissaasinnaassanngilaq. Periarfissaqarpalli pissutsillu tamanna ajornartinngippassuk uumasuuteqarnermut oqartussat uumasoq imaluunniit uumasut allamut inissinneqarnissaat pillugu aalajangiisinjaapput, assersuutigalugu sanilerisamut imaluunniit savaateqarfimmut sanilerisamut, tamannalu ajornanngippat allaat kommunip ingerlatsivianut. Aalajangersakkap taassuma atorneqarnerani uumasumut pitsaanerpaaq pissusivinnut saniliullugu nalilersuivittooqassaaq, tassunga ilanngullugit uumasup inissiffissaanut assartorneqarneranut atatillugu periarfissat aporfissallu kiisalu aningaasartuutit tassunga atasut, aamma anguniagaq anguniarneqartoq. Taamatut nalilersuinerup aamma inernerisinjaavaa nuunneqarneratigut toqqissiveerutsinnagu piginnittumillu paarineqarnera illersorneqarsinnaanngippat sumiiffimmi uumasup illersorneqarsinnaasumik toqunneqarnera, tak. imm. 3.

Qaqgukkut uumasuuteqarnermut oqartussat akuliutissanersut piffissalerneqanngilaq. Piffissaq qanoq sivisutigisoq ingerlassanersoq nalilersuivinneq apeqqutaassaaq. Maleruagassani siunertaq tassaavoq piaartumik iliuuseqarnissap qulakkeerneqarnissaa. Pisut ilaanni peqqusinerup kinguninngua iliuuseqartoqarsinnaavoq, uumasunut akisussaasoq iliuuseqarnianngitsoq paasineqarsinnaappat. Peqqussuteqarnermi akisussaasup pisariaqartumik iliuuseqarnissaanut piffissaq nalinginnaasumik sivikitsuusariaqarpoq.

(§ 23, imm. 3)

Aalajangersagaq imm. 2-mut sanilliunneqassaaq.

Uumasuuteqarnermut oqartussat pissutsit tamanna pisariaqartippassuk uumasoq tunineqassasoq imaluunniit toqunneqassasoq piaartumik imaluunniit kingusinnerusukkut aalajangiisinjaapput. Assersuutigalugu ersarippat piginnittoq paarseqqissinnaanngitsoq uumasuuteqarnermut oqartussat uumasup tunineqarnissaanik aalajangiisinjaapput. Aalajangersagaq assersuutigalugu atorneqarsinnaavoq savaatillip nunaatini qimappagu imaluunniit uumasuutiminut tunngatillugu pisussaaffimminik sumiginnaappat. Uumasuutit

annertuumik ajoquteqanngippata aammalu allamut tunniunnissaanut tulluarpatu uumasuuteqarnermut oqartussat inummut allamut uumasuutinik tuniniaasinnaapput.

Imm. 3 annertunerusumik akuliunnertut isigineqassaaq, taamaattumillu aalajangersagaq taanna atorneqassappat pissutsit immikkorluinnaq issallutik. Pisunut taamaattunut aalajangersakkap oqaasertaani assersuusiortoqarpoq, tak. "uumasut qanoq innerat", "uumasoq piginnittuminit siunissami paarineqaqqissinnaanersoq " aamma "uumasup allamut nuunneqarnerani aningaasartuutit". Assersuusiorneq tamakkiisuunngilaq, kisiannili pissutsinut pingartinneqarsinnaasunut assersuutitut isigineqassalluni.

Aalajangersagaq manna malillugu toqutsinissamik aalajangiineq toqtsisoqarnissaa pillugu peqqusisoqanngikkaluarpalluunniit pisinnaavoq. Imaattoqarsinnaavoq paasineqartoq uumasup allamut inissinneqarsinnaanngitsoq illorsorneqarsinnaasumillu paarineqarsinnaanngitsoq ajornakusoortoq. Tamatumani pissutsit piviusut siuliini eqqartorneqartut isiginiarneqassapput.

Nuussinermut aningaasartuutit piginnittumit akilerneqarsinnaapput, tak. § 25, imm. 2, oqaaseqatigiit siulliat. Inissiineq kiisalu toqtsineq piginnittumut taarsiinertaqanngitsumik ingerlanneqassaaq, § 25, imm. 2, oqaaseqatigiit siullit malillugit. Inissiinermut atatillugu piginnittoq akiliisinneqassanersoq nalilersuivinnermik tunngaveqassaaq, ilaatigut pisup qanoq ajortiginera pingartinneqarluni. Uumasup inissinneqarneranut aningaasartuutit piginnittumit akilerneqanngippata uumasuuteqarnermut oqartussat tamatumunnga atasunik aningaasartuutit akilissavaat imaluunniit uumasup piginnittumiiginnarnissaa illorsorneqarsinnaanngippat uumasup toqunneqarnissaa pillugu aalajangiillutik.

(§ 23, imm. 4)

Aalajangersagaq imm. 1-imut sanilliunneqassaaq.

Uumasuuteqarnermut oqartussat toqutsinissamut peqqusummik nalunaaruteqarsinnaapput, uumasup uumatiinnarneqarnissaa uumasumut pisariaqanngitsumik naalliutsitsinermik kinguneqassappat. Piginnittoq imaluunniit uumasumut akisussaasoq tassaavoq peqqusummik naammassinnittussaq. Peqqusineq ingerlaannaq malinnejartussatut imaluunniit piffissaliilluni peqqusinertut aalajangerneqarsinnaavoq. Piffissaliineq aallaaviatigut sivikitsuaraasariaqarpoq. Piffissaliinerup qanoq sivikitsigisariaqarneranut naliliivinnejapeeqquaassaaq, kisiannili aalajangersakkap atuuffia eqqarsaatigalugu ilimagineqartariaqarpoq piffissaliineq nalunaaruteqarnerup kingorna sivilsunerpaamik nalunaaquutap akuunerinik marlussunnik imaluunniit ullup unnuallu taassuma iluanut aalajangerneqassasoq.

(§ 23, imm. 5)

Aalajangersagaq imm. 1-imut sanilliunneqassaaq.

Inatsimmi § 6, nr. 4 malillugu aalajangersakkat unioqqutillugit uumasuutigineqartut toqunneqarnissaannik uumasuuteqarnermut oqartussat peqqusisinnaapput. Tamanna pillugu

aalajangersakkat erseqqinnerusut siunissami allaffissornikkut malittarisassiani allanneqassapput.

(§ 23, imm. 6)

Aalajangersagaq peqqusummut atatillugu piumasaqaatit malinneqartussat eqortinnejarnissaannik imaqarpoq. Peqqusut aalajangersagaq naapertorlugu allakkatigut nalunaarutigineqassaaq, illuatungerisarlu oqaaseqarnissaminut periarfissinneqassalluni. Peqqusummi aamma ilaatigut tunngavilersuineq pillugu pisortat ingerlatsineranni suliassat suliarineqartarnerat pillugu inatsimmi aalajangersagaq malinneqassaaq.

Peqqusinerup allakkatigut nalunaarutigineqartussaanerata uumasuuteqarnermut oqartussat peqqusinerup massakkut naammassineqarnissaanik peqqusisinnaanerannut akornutaanngilaq. Uumasuuteqarnermut oqartussat assersuutigalugu sumiiffimmi peqqussusiorsinnaapput illuatungerisamiillu oqaaseqaammik pissarsillutik taamaalereerunillu ingerlaannaq peqqussuteqarlutik, soorlu aamma peqqussutip ingerlaannartumik kinguarsarneqarani malinneqarnissaanik peqqussuteqarsinnaasut. Ingerlaannartumik peqqusinerit aamma oqaasiinnartigut pisinnaapput. Taamaattoqarpat aalajangiineq suliassanik suliariinnittarnermut malittarisassat nalinginnaasut naapertorlugit piffissami siullermi allanngorlugu nassiunneqassaaq.

(§ 23, imm. 7)

Aalajangersakkami aalajangersarneqarpoq allaganngortitsinissaq oqaaseqaateqartitsinissarlu pillugit malittarisassat pissutsit tamassumunnga pissutissaqartitsippata saneqqunneqarsinnaasut. Tamassumani atuuppoq assersuutigalugu toqutsinissaq kinguartinneqarsinnaanngippat, tassa toqutsinissami akisussaasup oqaaseqaateqarnissaa utaqeqassappat akisussaasorluunniit naapinnejarnissaanngippat uumasup pisariaqanngitsumik naalliunnerani kinguneqassammat. Aalajangersagaq allamik pisariaqannginnermi iliuutsitut isagineqassaaq, tassani uumasup § 1 naapertorlugu anniarsinnaaneranut il.il. pitsaanerpaaamik illorsorneqarnissaanik qulakkeerinnittoqarluni.

Nr. 7-imut (§ 24, imm. 1)

Aalajangersakkami aalajangersarneqarpoq uumasuuteqarnermut oqartussat uumasumik ingerlaannartumik toqutsisinnasut, 23, imm. 4 naapertorlugu peqqussuteqarnerup kingorna toqutsinissaq kinguartinneqarpat uumasoq pisariaqanngitsumik annertuumik naalliutsinneranik kinguneqassappat.

(§ 24, imm. 2)

Uumasuuteqarnermut oqartussat uumasumik toqutsinermik isumaginnissinnaanngippata toqutsinerup isumagineqarnissaanut sinniisumut piginnaatitsisinnapput. Uumasuuteqarnermut oqartussat Kalaallit Nunaata illoqarfiiini nunaqarfiiinilu tamani najuutinngilaq, aamma Kalaallit Nunaanni angalaneq ilaatigut ullunik arlalinnik sivisussuseqarsinnaasarpoq sila timmisartullu angalanissaannut pilersaarutit pissaallutik.

Taamaattumik uumasuuteqarnermut oqartussat toqutsinerup isumaginissaanut sinniisup piginnaatinneratigut sumiiffinni ingerlatsivinnit suleqateqarnissamut periarfissaqarnissaat siunnersuutigineqarpoq. Sinniisoq assersuutigalugu tassaasinnaavoq sumiiffimmi qimminik nakkutilliisoq, imaluunniit piniartoq toqutsinermik ilisimasaqarluartoq. Toqutsinermik isumaginnittussanngorlugu piginnaatinneqartup sukkasuumik anniarnertaqanngitsumillu toqutsisoqarnissaa pillugu Inatsisartut inatsisaani § 13-ip eqqortinneqarnissaa isumagissavaa. Piginnaatitsineq allakkatigut oqaasiinnartigulluunniit pisinnaavoq, allaganngorlugu uppernarsaat kingornatigut nassiunneqarluni. Piginnaatitsineq uumasumut ataatsimut arlalinnulluunniit atuussinnaavoq, kisianni piffissamut killilimmuit taamaallaat atuulluni taamaalillunilu piginnaatitsinertut ataavartutut tunniunneqarsinnaanani.

Toqutsineq piginnittumut taarsiissutaassanngilaq aamma piginnittumit akilerneqassalluni, kisiannili tamatumunnga atasunik aningaasartuutinik sumiiffimmi oqartussat sinnerlugit uumasuuteqarnermut oqartussat akiliisinnaallutik kingornalu akisussaasunut akileeqqusillutik.

Qimminik nakkutilliisoq, piniartoq il.il. piginnaatinnissaat ajornarpat toqutsinerup isumaginissaanut uumasuuteqarnermut oqartussat politiit imaluunniit sumiiffimmi kommunefogedi qinnuigisinnaavaat. Tamannali periarfissat allat tamarmik periarfissaajunnaarsimappata aallaaviusumik pisariaqarpoq.

Nr. 8-imut

(§ 25, imm. 1)

Aalajangersakkami aalajangersarneqarpoq piginnittumut taarsiissutaanngitsumik uumasut pisariaqanngitsumik naalliunnissaannut illersuineq pillugu inatsimmi matumani aalajangersagaq naapertorlugu toqtsisoqartassasoq. Tamatuma saniatigut toqutsineq piginnittumit akilerneqassaaq. Aalajangersagaq annertusineqarpoq sumiiffinni qitisiumilu oqartussat toqutsinermut atatillugu aningaasartuutaasa matussuserneqarnissaat qulakkeerniarlugu. Tulluartuunermik isiginninneq aallaavigalugu akisussaasoq taassaasariaqarpoq inatsimmik unioqqutitsinermi tassunga atatillugu aningaasartuutinik akiliisussaaq. Tamannalu atuuppoq pisoq piaaraluni piaarinaniluunniit pisimanersoq apeqquaatinngagu. Uumasumik pisismagaanni, pingartumillu inuussutissarsiuqartutut uumasunik arlalinnik uumasuuteqaraanni uumasut taakku illersorneqarsinnaasumik uumasuutiginissaannut piumasarineqartut suunersut ilisimaneqarnissaat naatsorsuutigisariaqarpoq.

Aningaasartuutiviit kisimik akileqquneqassapput.

(§ 25, imm. 2)

Aalajangersakkami aalajangersarneqarpoq uumasumik inissiineq kiisalu tuniniaaqqinnej piginnittumut taarsiissutaassanngitsoq. Tamanna imm. 1-imi tunngaviit assigalugit pissaaq. Inatsimmik unioqqutitsisoq sumiginnaasumik pissusilersorsimanerminut

taarsiiffigineqassanngilaq. Tamatuma saniatigut allamut nuussineq piginnittup akilissagaa aalajangersarneqarpoq.

Inissiinermut atatillugu aningaasartuutit sumiiffimmi pissutsit aamma uumasuutit inissinneqartussat qanoq amerlatiginerapeqqutaatillugit aningaasarpassuarnik annertussuseqarsinnaapput. Taamaattumik nalilersuisoqavissaaq, tassani tassunga atatillugu aningaasartuutit kiisalu pissutsit annertutiginerat pingaartinneqassallutik. Aalajangersakkami aamma inissiinermut atatillugu nakkutilliinermi oqartussat aningaasartuutiminnik matussusiinissaat qulakkeerneqassaaq.

(§ 25, imm. 3)

Aalajangersakkami aalajangersarneqarpoq peqquneqartup aalajangiinerup pineqartumut nalunaarutiginerata kingorna ullut 14-it iluanni suliamik eqqartuussivinnut suliassangortitsisisinnaasoq. Tassunga peqatigitillugu aalajangersarneqarpoq eqqartuussivinnut suliassangortitsineq, § 23 imm. 5 pinnagu, kinguartitsinermik kinguneqassanngitsoq, peqqussullu suliap inaarutaasumik aalajangiiffigineqarnissaata tungaanut atuutiinnassasoq.

Eqqartuussivinnut suliamik suliassangortitsinissamut qaammatisiutit malillugit ullunik 14-inik piffissaliineq kinguartitsinermillu kinguneqassannginnera uumasut pisariaqanngitsumik naalliunnissaasa pinaveersimatinnissaa siunertaralugu nukinginnartuuneranut § 23, imm. 1-5-im i tamanit atuuttumut ataqtigiissillugu isagineqassaaq.

Nr. 9-mut (§ 26)

Aalajangersakkami uumasuuteqarnermut oqartussat, tassunga ilanngullugit sulisut, eqqartuussivimmuit akuersisummik pissarseqqaaratik, kinaassutsiminik uppernarsaateqarlutik uumasuuteqarfimmuit isersinnaasut aalajangersakkami piginnaatinneqarput. Tamanna pisariaqartutut nalilerneqarpat aalajangersagaq atorneqassaaq aammalu naligiimmik pinninnissamik tunngavik naapertorlugu atorneqassalluni. Tulliullugu inatsimmi aalajangersakkat imaluunniit malittarisassat inatsit naapertorlugu allaffisornermut malittarisassiani aalajangersarneqartut eqquutsinneqarnissaat siunertaralugu aalajangersagaq atorneqassaaq.

Aalajangersakkami uumasuuteqarnermut oqartussat uumasuuteqarfimmuit sumulluunniit isersinnaanermik piginnaatinneqarput, tassa ataatsimik amerlasuunilluunniit uumasuuteqarfimmuit sumulluunniit. Aalajangersagaq nunaateqarnermi uumasuutinut, uumasuutinut inuussutissarsiornermi atorneqartunut aamma angerlarsimaffinni uumasuutinut atuuppoq. Uumasuuteqarnermut oqartussat pisariaqarfiatigut ikiorneqarnissamik politiinut qinnuiviginissinnaapput.

Amerlanertigut ilimagisariaqarpoq uumasuuteqarnermut oqartussat tamatuminnga noqqaagunik uumasuutillip uumasuuteqarnermut oqartussat uumasuuteqarfimmuit

isersinnaatissagai. Pisut ilaanni uumasuuteqarfimmut isersinnaaneq ajornakusoorsinnaasarloq, piginnittoq najuutinngikkaangat imaluunniit pineqartoq suleqataajumanngikkaangat. Eqqartuussivimmut akuersissummik pissarsiniaqqarneq akuliunnissamut pisariaqartumut kinguarsaataasinnaavoq taamaalillunilu uumasut pinngitsoorneqarsinnaagaluamik naalliuksinneqarlutik.

Aalajangersagaq aamma inuussutissat pillugit inatsisartut peqqussutaat, qimmit qimuttut kiisalu qimmiuteqarneq qitsuuteqarnerlu pillugit inatsisartut inatsisaat aamma nappaatit uumasut inuillu akornanni tuniluuttartut pillugit Inatsisartut inatsisaat naapertorlugit uumasuuteqarnermut oqartussat aamma piginnaatitaanerannut aalajangersagaq naapertuuppoq.

Anguniakkat anguneqartussatut eqqarsaatigineqartut isiginiarlugit aalajangersagaq atorneqassaaq. Taamaattumik uumasut illersorneqarnerinut tamanna pisariaqartutut isigineqarpalut piumasaqaatigineqarpallu aalajangersagaq atorneqassaaq. Atuineq anguniakkanut pisussaaffinnullu inatsimmi § 1-imi aamma 3-imi allaaserineqartunut ilanngunneqarsinnaavoq.

Uumasuuteqarnermut oqartussat uumasuutinut il.il. pineqartunut isersinnaanngippata, nalilersuereernermi oqartussaanerup ingerlanneqarnissaanik pisariaqartutut nalilerneqarpalut politiit najuunnissaat pisariaqartoq oqartussat eqqartuussissaaseq pillugu inatsimmi § 61, imm. 1-imi tamanna pillugu malittarisassat nalinginnaasut malillugit politiinit ikiorneqarnissamik qinnuiviginissinnaapput.

#### Nr. 10-imut (§ 27)

Inatsisartut inatsisaanni aalajangersakkanik unioqqutitsinerit il.il. pillugit pineqaatissiinissamut periarfissanik aalajangersakkami aalajangersaasoqarpoq.

Assersuutigalugu nunalerinermi piniartuunermilu arsaarinnissuteqarneq pineqaatissinnejartumut sakkortuumik kinguneqarsinnaammatt, suliani taamatut ittuni arsaarinnissuteqarneq taamaallaat pisinnaavoq pissutsit paassisutissallu takuneqartut taamatut pisoqariataaqqissinnaanera qanittutut ilimasunnissamut aamma tunngavissaqartitsippata.

Soorlu § 27, imm. 4-mi allaqqasoq Kalaallit Nunaanni pinerluttulerineq pillugu inatsit naapertorlugu uumasuuteqaaqqusinnginnermik passussinnginnissamilluunniit pineqaatissiisoqarsinnaavoq. Naatsorsuutaavoq tamassuma kingunerisaanik akiliisitsissutit § 27, imm. 1 malillugu akiliisitsissutit annertunerussasut.

Kalaallit Nunaanni pinerluttulerineq pillugu inatsimmi malittarisassat naapertorlugit pineqaatissiissuteqarsinnaanermik maanna ammaassisooqarpoq. Taamaalilluni ilaatigut pineqaatissinnejarsimasut isertitsivimmut inissiinissaat maanna periarfissaalerpoq. Tamanna pineqaatissiinertut annertunngaatsiartutut isigineqartariaqarpoq taamaattumillu aatsaat

annertuumik imaluunniit uteqqiattumik unioqqutitsinerni taamaallaat atorneqartariaqarluni. Isertitsivimmut inissiineq assersuutigalugu § 3 a-mik annertuumik unioqqutitsisoqartillugu atorneqarsinnaavoq.

Akiliisitsinikkut, uumasuutinik uumasuuteqarsinnaanermillu assarneqarnikkut imaluunniit inissiisarfimmut inissinneqarnikkut pineqaatissiinerup ingerlanneqartariaqarneranik naliliinermi pissutsit uku pingaartinneqassapput:

#### Akiliisitsinikkut pineqaatissiineq

Akiliisitsinikkut pineqaatissiisoqassanersoq nalilersuinermi ilaatigut siullermeertumik unioqqutitsisoqarnersoq, pissutsit unioqqunneqartut malitsigisaasa sunniutai kiisalu iliuuseqarnermi piaarinerup sakkortussusia isigniassallugit tulluarsinnaavoq. Iliuuseqarnermi uumasumik ajoqsiinissaq siunertaqanngippat tamanna qajassuussinissamut tunngavissiissaq. Tamanna qimuttut naammattumik takissuseqartumik kalunnilersimanerini imaluunniit kalunnerit ilattoorsimanerini pigajuttarpoq. Aammattaq uumasoq naammattumik nerisassaqsimanngippat imissaqarsimanngippallu. Tamanna soorunami uumasup qilannerata perlilerneratalu malitsigisaanik toqungajassimanerani atutissanngilaq. Taakku saniatigut uumasut paarineqarnissaat aamma inuussutissarsiornerup paarineqarnera pillugu ilisimasaqarnissamut annertunerusumik piumasaqaateqarpoq, assersuutigalugu qimuttunik piginnittut savaatillillu, nalinginnaasumik uumasuuteqartunut sanilliullugu, ulluinnarni sulinermut iliuuseqarnermullu atasumik uumasunik suliaqanngitsut.

#### Kalaallit Nunaanni uumasuuteqarsinnaanermik imaluunniit uumasuuteqarnermi suliaqarnissamik arsaarinninnissamik pineqaatissiineq

Uumasuutinik imaluunniit uumasuuteqarnissamik arsaarinninneq kiisalu inissiisarfimmi inissinneqarneq suliani sakkortuumik imaluunniit uteqqiattumik unioqqutitsisoqarnerani atorneqassapput. Taamaalilluni siullermeertumik ingasattumik kukkulutornerusinnaavoq, imaluunniit uteqattaartumik unioqqutitsisoqartarnerani. Ingasattumik unioqqutitsineq assersuutigalugu tassaasinnaavoq qimmeq pamiumigut kipineqarsimappat, kigutai kukiiluunniit peerneqarsimappata, imaluunniit kilerneqarsimappat ikeqarpallu, tamanna uumasut nakorsaat akuerisaasoq isumasioqqaarnagu pisimalluni. Uumasunik kinguaassiutitigut atoqateqarneq amerlanertigut ingasattumik unioqqutitsinertut isigneqassaaq. Ingasattumik unioqqutitsineq aamma tassaasinnaavoq inuup allap uumasuuttaa ajoquserneqarpat imaluunniit allatigut paarinerlugaappat. Immikkut ingasattutut isigneqarput ajoqusiineq imaluunniit sumiginnaaneq piffissami sivisunerusumi pisimappat, taamaattumillu uumasoq piffissami sivisuumi anniartinnejarsimappat, naalliutsinnejarsimappat allatigullu akornuserneqarsimappat. Tassunga ilanngunneqarput assersuutigalugu qimitsinikkut imaluunniit ipititsinikkut toqtsineq, tassa tamanna arriitsutut aamma uumasumut anniaataasumik toqunertut isigneqarmat.

Uumasuutinik imaluunniit uumasuuteqarnissamik arsaarinninneq ataavartumik pisinnaavoq imaluunniit piffissami killeqartumi pisinnaalluni. Immikkut ittumik sakkortuumik

unioqqutitsinerit qaqgumulluunniit uumasuuteqaqqusaajunnaarnermik aamma Kalaallit Nunaanni pinerluttulerineq pillugu inatsimmi malittarisassat naapertorlugit, assersuutigalugu inissiisarfimmut inissiinermik akiliisitsinermilluunniit pineqaatissiissutaasinnaapput.

Nr. 11-imut

Siunnersuutigineqarpoq Inatsimmi tamani danskisuani "Landsstyret" imatut "Naalakkersuisut" aamma "Landsstyrets" imatut "Naalakkersuisuts" allanngortinneqassasut.

## § 2

Siunnersuutigineqarpoq Inatsisartut inatsisaat ulloq 1. juli 2019-imiit atuutilersinneqassasoq.